

**Ọkwukwo izi
ke Mbom
Pọlu gbaznenu
Ele Kọrinti**

Nhne gbasiri ọkwukwo izi ka

Ọkwukwo izi Pọlu gbaznenu ele Kọrinti ke mbom neelebna anya nọ bụdnu nọ ọkwnata mkpoma ke nye Karaịsi. O nookwu ọka gbasiri mkpa ke zị nọ ọgbako Chiokike ke zị nọ Kọrinti ke Pọlu miteru. Nọ ige wam, Kọrinti bụ ẹli-ọhna ke zị mkpa n'ẹli Giriisi, ke bụ risi ọchichi ẹli Rom n'ọdoru-ẹli wam. Ele ẹli ka bụ ele be marnu rẹwhna be n'ahia, ele mkpako, nọ ele agwa ojo, ele nọokponu chi zị ichne ichne risi ẹli.

Pọlu nookwu gbasiri okewa nọ agwa ojo ke zị nọ rime ọgbako Chiokike pji. O kwuru nhne gbasiri bụdnu ọgbako Chiokike nọ okpukpe, olizọ n'ẹnwu, ọlulu nzi nọ nnwerne. O kwuru nọ Izi Oma nwernu ọsisa kpakara aiji ele ka.

Nọ risi 13, Pọlu gesiri nọ ọwhnun'anya bụ ngozi ke kakwo mma Chiokike nyernu ele badnu.

Nhne zị n'ọkwukwo izi ka

Ọpanizo (1:1-9)

Okewa nọ rime ọgbako (1:10---4:21)

Agwa oma nọ bụdnu ezi-nu-oro (5:1---7:40)

Ele Karaịsi nọ ele naakwa rẹnwu (8:1---11:1)

Bụdnu ọgbako nọ okpukpe Chiokike (11:2---14:40)

Olizọ n'ẹnwu Karaịsi nọ ke ele kweru ekwe (15:1-58)

Nkesi ele Karaịsi nye ele zị nọ Judiya (16:1-4)

Mmụma Pọlu nụ okwukwo (16:5-24)

¹ Mawa, Pọlu, nye Chiokike sukwuru hite n'echiche ma ọ bụru nye izi Karaịsi Jizọsi nụ nnwọ nda aị Sọsitenisi, ² naagbaznenu anụ, ọgbako Chiokike ke zị nụ Kọrinti ọkwukwo. Anụ bụ ele Chiokike sukwuru ma anụ be bụru ele ke a zị nsọ nụ Karaịsi Jizọsi, anụ nụ kpakara ele zị nụ hne ọbula be nọokpokwu rẹwhna Nyenwe aị Jizọsi Karaịsi, Nyenwe be nụ Nyenwe aị.

³ Oru nụ udno ke Chiokike Nda aị nụ Nyenwe aị Jizọsi Karaịsi dazinu anụ.

Ọtu mmamma

⁴ M nọotunu Chiokike m mmamma ige ọbula nụ risi anụ, o nyernu anụ oru hite nụ Karaịsi Jizọsi.

⁵ O mernu anụ ba aba nụ rime Karaịsi nụ kpakara nhne, ma nụ ikwu-ọnu nụ nhne ọmuma anụ. ⁶ Izi gbasiri Karaịsi gwuzosiri rikne nụ rime anụ. ⁷ Kam

kpayaru, ọ zá nkesi ke enine kọgwu anụ kpa anụ neese ige be jookpume Nyenwe aị Jizọsi Karaịsi.

⁸ O jeeme anụ gwuzoru kwem dū ọsoto, ma anụ bụru ele nwée ọru n'ọbochi Nyenwe aị Jizọsi Karaịsi.

⁹ Chiokike, nye sukwuru anụ ma anụ nụ Nnwọ a Jizọsi Karaịsi Nyenwe aị nwekọta nhne, bụ nye kwesiri ọkwnata ovu.

Okewa nụ rime

Ọgbako Chiokike

¹⁰ Rụmu nda m, m ji m rẹwhna Nyenwe aị Jizọsi Karaịsi naariasno anụ, anụ bikno, anụ kwekọrita n'otu nhne anụ nookwu, okewa zọma n'esilawuru anụ. Anụ ziri n'otu n'echiche ma nụ nhne anụ neeme. ¹¹ Rụmu nda m, agwna ele hi n'ezinụ-oro Kilo kannu m kpa o dnornu m anya, nụ okno ọka

zị n'esilawuru anụ. ¹² Ka bụ nhne me naakaa, otu badnụ naakaa, “M bụ m ke Pọlu,” nye berere kaa, “M bụ m ke Apọlosi,” nye berere kwno kaa, “M bụ m ke Pita,” nye berere masị kaa, “M bụ m ke Karaịsi.”

¹³ Be kewarụ Karaịsi sa? Be kpogidnenu Pọlu n'olu oḡba kwnornu anụ? Be wụru anụ mini nụ rẹwhna Pọlu sa? ¹⁴ M nọtunu Chiokike mmamma nụ ọ zá nye me wụru mini kwekọlam Kirisipọsi nụ Gayọsi. ¹⁵ Ọ zá nye jaakaa sị nụ me wụru a mini nụ rẹwhna m. ¹⁶ (Owe, m wụru m ezi-nụ-oro Stefanasi mini, be gweme kpam, m máam ma m wụru m nye berere mini.) ¹⁷ Karaịsi zíyage m me wụ mini, kọvu o zni izi ọma. Ọ búo hite n'ikwu-ọnu ke akọniche badnụ, ọ zị ẹnwu Karaịsi n'olu oḡba bụru nhne etekne.

*Karaịsi bụ akọniche
nụ iknernema Chiokike*

¹⁸ Kwnornu nụ izi gbasịri oḡba bụ nhne etekne hne ele nọonwu ọnuwụ zị, kọvu hne ele be nọoznohia zị, ọ bụ iknernema Chiokike. ¹⁹ Be gbarụ a n'ọkwukwo nsọ, kaa,
“M joolulu akọniche ke ele akọ,
tuwuhu oghohia ke ele marnụ nhne.”

²⁰ Ndaa hne nye akọ zị? Ndaa hne nye okne ọkwukwo zị? Ndaa hne nye agirigo ke ọwa ka zị? Chiokike mernu akọniche ke ọwa bụru nhne iwhnirniwhno. ²¹ Kwnornu nụ hite n'akọniche Chiokike o kwéle ọwa mahia nye ọ bụ hite n'akọniche ke ọwa. Ọ sọru Chiokike n'ọnu o hite n'iwhnirniwhno ke ọkpo okwo izi ọma znọhia ele kweru ekwe. ²² Ele Ju noopio nhne elekema, ele Giriki noopio akọniche. ²³ Kọvu a nọokpo

okwo nū be kpogidnenu Karaisi n'olu oḡba, ke bụnu ele Ju rugwu okpobi ochi, hne ele bụo ele Ju zị, o bụ nhne iwhnirniwhno. ²⁴ Kọvu hne ele Chiokike sukwuru zị, ele Ju ma ele bụo ele Ju, Karaisi bụ iknernema Chiokike nū akoniche Chiokike. ²⁵ Kwnornu nū iwhnirniwhno Chiokike kakwo akoniche ke badnū, rikne oḡwugwu Chiokike kakwo iknernema ke badnū.

²⁶ Rumu nda m, anū chenwanya nhne anū bụ sū Chiokike sukwuru anū. Agida anū bụ ele owa karū nū be nwée akoniche, agida anū bụ ele owa máa, agida anū bụ ele híge ezi-nū-oro eze whuya. ²⁷ Kọvu Chiokike hohiaru nhne iwhnirniwhno ke owa ma iwhnerne tū ele akọ. Chiokike hohiaru nhne ele owa karū nū o zila rikne ma iwhnerne tū ele zị rikne. ²⁸ Chiokike hohiaru nhne ele owa lednarnū anya nū nhne zá nhne o bụ, mee nhne ke be kwuru nhne bụru nhne etekne. ²⁹ O mernu ka ma badnū obula gharū o mee oknomokno nū ruwhnu Chiokike. ³⁰ Chiokike mernu anū nū Karaisi Jizosi bụru otu, nye burunu aị akoniche nū rime Chiokike. Ya bụ ome mma aị nū ozi nsọ aị nū oḡbahia aị. ³¹ Lele kpa be gbarū a n'okwukwo nsọ, “Nye obula ke jeeme oknomokno, o mee oknomokno nū nhne Nyenwe aị rnūnu.”

2

Izi oma gbasiri Karaisi nū oḡba a

¹ Rumu nda m, nga me vakwnusiri anū, m jíle m okne oka mọbu akoniche ke badnū va kpọ okwo nhne tugwaru otugwa ke Chiokike. ² Kwnornu nū m píole m o marnū nhne obula kpa me nū anū

zi, kwekọlam nhne gbasiri Jizosi Karaisi, nye be kpoigidnenu n'ogba. ³ M ji m oza rikne nu ogwnu nu ehni oznu biri biri va. ⁴ Nhne me znirni nu izi m buo hite nu nkari oka ke akoniche ke badnu, kovu o gesi Enine nu iknernema a n'esilawuru anu, ⁵ ma anu buru ele kweru ekwe, o buo kwnornu nu akoniche ke badnu, kovu n'iknernema Chiokike.

Akoniche Chiokike

⁶ Kovu n'esilawuru ele sozuru osozu bu hne a nookwu oka akoniche, o buo akoniche ke owa ka, mabu ke ele nzechio wa ka. Ige mati, o za nhne be jobu. ⁷ A nookwu nhne gbasiri akoniche Chiokike ke tugwaru otugwa, ke Chiokike hohiaru kwnornu igwugwu ai tutu su owa panizoru. ⁸ Ele ochichi ke owa ka ma akoniche ka. Kwnornu nu o buru nu be marnu a, be bo kpoigidene Nyenwe igwugwu n'olu oga. ⁹ Kovu kpa be gbaru a n'okwukwo nsu,

“Anya whnulele,
nsni nulele,

o bnana n'ovu badnu rira rira,

nhne Chiokike bitannu ele whnurru a n'anya.”

¹⁰ Kovu Chiokike hiri n'Enine a kpumenu ai nhne o tugwaru otugwa, kwnornu nu Enine noonyosna kpakara nhne, ma nhne miri emi ke Chiokike. ¹¹ O za nye magwu echiche ke mkpoma badnu, o kwolem enine ke zi nu rime badnu. Kpam masi, o za badnu ke magwu echiche Chiokike, okwolem Enine Chiokike magwu kpakara nhne gbasiri Chiokike. ¹² A nahage enine ke owa ka, kovu a nahiaru Enine Chiokike ziyaru ma a mahia kpakara nhne Chiokike hiri n'ovu oma a kesi ai. ¹³ Ka bu nhne a nookwu, o buo

hite nū nhne ke badnū znirni aị nū akoniche ke badnū, kovu nhne Enine znirni aị. A nọkowa ezi ọka ke enine hne ele nwernu Enine Chiokike zi. ¹⁴ Badnū ke nwée Enine Chiokike nwée rikne kweru nhne hi n'Enine Chiokike va, kwnornu nū be bụnu a nhne iwahnirniwhno, o nwée rikne nahia be kwnornu nū Enine Chiokike nọkowanu ele nwernu Enine. ¹⁵ Badnū ke nwernu Enine Chiokike neekpe kpakara nhne ikpe, kovu ọ zá nye jeekpe a ikpe. ¹⁶ Lele kpa be gbarū a n'ọkwukwo nsọ,
 “Nyele magwū echiche Nyenwe aị,
 ma nye wam zni a ezni?”
 Kovu a nwernu echiche ke Karaịsi.

3

Ele ọnu Chiokike

¹ Rumu nda m, m nwée m rikne kwunu anụ ọka lele ele nwernu Enine, kovu m nookwunu anụ ọka lele badnū etekne, lele rumu takiri nū rime Karaịsi. ² M jeeji mini-ọma nọoznu anụ, ọ búo wiri siri rikne, kwnornu nū anụ jéenwe rikne ri be. Tem dụ kịtna, anụ nwée rikne ri wiri siri rikne. ³ Anụ zị kọriri n'anọ-ẹhni, kwnornu nū okwno-awụwa nū okno ọka zị n'esilawuru anụ, ka ọ zá neegesi nū anụ zị n'anọ-ẹhni? Anụ neeme lele badnū etekne. ⁴ Otu badnū naakaa, “M bụ m ke Pọlu.” Nye berere kaa, “M bụ m ke Apọlosi.” Anụ zá neeme lele badnū etekne?

⁵ Nyele bụ Pọlu? Nyele bụ Apọlosi? A bụ ele ọnu, ele anụ hiri n'aka be kweru. Nye ọbula nọornu ọnu ke Nyenwe aị nyernu a. ⁶ Mawa kpasiri mkpuru, Apọlosi wusi a mini. Kovu Chiokike mernu mkpuru wam so oso. ⁷ Nye wam kpasiri mkpuru nū nye

wam wụsiri a mini bụ nhne etekne. Chiokike zị mkpa kwnornu nụ ọ bụ ya mernu mkpuru wam so oso. ⁸ Nye wam kpasiri mkpuru nụ nye wam wụsiri a mini bụ otu. Nye ọbula jaanarnu ọgwo ọnu a lele kpa ọnu a hna. ⁹ Kwnornu nụ aị nụ Chiokike nọornuko ọnu n'otu, anụ bụ ẹkwu Chiokike. Anụ bụ ọro Chiokike noowu.

¹⁰ Hite nụ oru Chiokike nyernu m, m nọornu ọnu lele nye nka-owu ọro. M tūru m ntụ-ẹli ọro, nye berere noowukwasị ọro n'olu a. Kọvu anya dū nye noowu ọro n'olu a ẹli. ¹¹ Kwnornu nụ ọ zá ntụ-ẹli berere badnụ jeenwe rikne tū, kakwo ke Chiokike tūru, ke bụ Jizọsi Karaịsi. ¹² Ọ bụru nụ badnụ ọbula jeeji golu, mọbu siliva, mọbu akaworugwu zị okne ọnu ahia, mọbu isisi, mọbu ruhiara, mọbu isisi ikpa wukwasị ọro n'olu ntụ-ẹli ka, ¹³ ọnu a jọowhuya iwhe, kwnornu nụ ọbochi Karaịsi jookpume a. Be jeeji bẹkwnu kpa ọnu nye ọbula iru, bẹkwnu jeegesi nhne nye ọbula jiri wu ọro a. ¹⁴ Ọ bụru nhne badnụ jiri wu ọro n'olu ntụ-ẹli wam gwuzogidne bẹkwnu, ọ jaanahia ọgwo ọnu. ¹⁵ Kọvu ọ bụru nụ bẹkwnu rne ọnu a, nhne whuru a, kọvu be jọoznohia a, kọvu lele nye hi nụ bẹkwnu whuya. ¹⁶ Anụ máa nụ anụ bụ Ọro Nsọ Chiokike, nụ Enine Chiokike wu nụ rime anụ? ¹⁷ Ọ bụru nye ọbula lulu Ọro Nsọ Chiokike, Chiokike joolulu a. Ọro Nsọ Chiokike zị nsọ, anụ bụ Ọro Nsọ a.

¹⁸ Ọ zá nye duhie ẹhni a, ọ bụru nụ nye ọbula neeche nụ o nwernu akọ nụ nhne ke ọwa ka, ọ ghọ nye iwahnirniwhno ma ọ bụru nye nwernu akoniche. ¹⁹ Kwnornu nụ akoniche ke ọwa ka bụ nhne iwahnirniwhno n'anya Chiokike. Lele kpa be gbarụ a n'okwukwo nsọ, “O jidnenu ele akọ

n'aghigo be.” ²⁰ Be gba kwno a n'okwukwo nso, kaa, “Nyenwe aị magwu echiche ele akọ nu o bu nhne etekne.” ²¹ O zi badnu ke ji nhne badnu etekne nwernu rikne mee nyaa risi. Kwnornu nu kpakara nhne bu ke anu, ²² Polu mọbu Apolosi, mọbu Pita, owa ka, budnu nu enwu, nhne zi kitna mọbu ke zi nu ruwhnu, kpakara be bu ke anu, ²³ anu bu ke Karaịsi, Karaịsi bu ke Chiokike.

4

Ele izi Karaịsi

¹ Ele badnu kwesiri o gwnu aị lele ele izi Karaịsi, ele Chiokike nyernu nhne tugwaru otugwa ke ezi oka a n'aka. ² Nhne be pioru n'aka nye neelegidne nhne obula bu be whnu a nu o bu nye kwesiri okwnata ovu. ³ Nhne anu nookwu gbasiri m za m mkpa, mọbu ikpe nye berere neekpe m, m jeeke ehni m ikpe. ⁴ Ovu m zi snam, kovu ka za neegesi nu m bu m nye ikpe mana. Nyenwe aị bu nye neekpe m ikpe. ⁵ Kam kpayaru, anu kpe nhne obula ikpe hne ige yooduge, seru tem Nyenwe aị va, o jeeme kpakara nhne tugwaru otugwa n'ochichiri whuya iwhe. O jaakahia kpakara nhne zi n'ovu badnu. Ige wam nye obula jaanahia oznarni a n'aka Chiokike.

⁶ Rumu nda m, m gweru m kpakara nhne ka tusinu ehni m nu ehni Apolosi kwnornu anu, ma anu jiri aị mụhia nhne ele badnu nookwu, “O za nye mee nhne be gbage n'okwukwo.” O za nye ji otu badnu nyaa risi megidne ibne a. ⁷ Nyele mernu i, i ziri ichne hne ele berere zi? Kini bu nhne i nwernu ke be kesige i? O buru nu nhne i nwernu bu nkesi, ndaa kpa i jeeji a nyaa risi lele nu o buo nkesi?

⁸ Kìtna, rụwho jìhìaru anụ. Anụ balam aba. Anụ ghọlam eze, ọ bụ n'ezì a búo ele eze. Ọ jaama mma ọ bụru nụ anụ bụ ele eze, ma a snornu anụ bụru masị eze. ⁹ M che m nụ Chiokike beteru aị ele izi aznụ, lele ele be joogbu ogbu, nhne olekiri nyee ọwa, ma hne ele enine izi nụ hne ele badnụ zì. ¹⁰ A bụ ele iwhnirniwhno kwnornu Karaịsi, kọvu anụ bụ ele nwernu akọ nụ Karaịsi. A nwée rikne, kọvu anụ nwernu rikne. Be lednarnụ aị anya, kọvu anụ nwernu igwugwu. ¹¹ Tem dụ kịtna, wiri nọogwnu aị, akpịri nọokpo aị bẹkwnu, a gba ẹto, be mejọru aị, a nwée hne a bita risi. ¹² A nọdogbu ẹhni aị n'ẹrnu, a jì aka aị nọornu nhne a neeri. Be nọovu aị ọnu, a nọogozì, nga be kpagburu aị, a snụta ovu. ¹³ Nga be kpajaru aị, a jì ovu ọma sa ọka. A nụ lele nhne mkpomkpo ke ọwa ka, tem dụ kịtna, ele ọwa kwúge aị nhne ọbula.

¹⁴ M zá m naagba ọkwukwo ka ma iwhnerne tū anụ, kọvu ma m zni m anụ ezni lele rụmu ke m me whnurnu n'anya. ¹⁵ Kwnornu nụ ọ bụru nụ anụ nwernu nri pokwu ele noodu anụ nụ rime Karaịsi, anụ nwernu otu nda. M bụ m nda anụ nụ rime Karaịsi Jizọsi kwnornu nụ m gweyanụ m anụ izi ọma. ¹⁶ M naariasno anụ snornu rẹnu ọchi m. ¹⁷ Kam kpayaru, me neeziyanu anụ Timoti. Ọ bụ nnwọ m me whnurnu n'anya ke kwesiri be kwnata a ovu nụ rime Nyenwe aị. Ọ jeechenwanyanu anụ kpa me noowu bụdnụ m nụ rime Karaịsi Jizọsi, kpa me neezni nụ rime kpakara ọgbako Chiokike ke zì nụ hne ọbula.

¹⁸ Agwna anụ bụ ele oknomokno, anụ neeche nụ m jáava lekwa anụ. ¹⁹ Ọ bụru nụ Nyenwe aị kweru, m jaava kwnusi anụ wara wara, m

jaamahia nhne ele oknomokno wam jeeme. O búo nhne be jookwu kpọi, ma rikne be nwernu masi. ²⁰ Kwnornu nù ẹli-eze Chiokike búo n'agida ikwu-ọnu kpọi, kọvu iknernema. ²¹ Ndaa nhne anụ piuru? Me gweru mbịnibini va, sù ọ bú ovu ọwhnun'anya nù enine zị wọhnerne?

5

Anụ gweme nnwọ nda ke zila rịchna

¹ M ọnonu nù ome ọyi zị n'esilawuru anụ, ke zila n'esilawuru ele máa Chiokike, nù badnù nookwuru nnwerne nda a. ² Ndaa kpa anụ neeme oknomokno nù kpa? Anụ kwesiri ọ kwna ẹkwna, nwe ovu ọjo, anụ kwesiri ọ chihala nyerukna ke mernu nhne ka n'esilawuru anụ. ³ O bú n'ezi m zị m ikere hne anụ zị n'anọ-ẹhni, kọvu me nù anụ zị n'enine, m marnù m nye mernu nhne ọjo ka ikpe lele nù me nù anụ zị. ⁴ Kpa anụ gbakọru nù rẹwhna Nyenwe aị Jizọsi, m joosno anụ gbakọ n'enine, rikne Nyenwe aị Jizọsi jaadazinu aị masi. ⁵ Anụ gweru nye wam yisi n'aka Ekwensu ma o lulu anọ-ẹhni a, ma be znọhia enine a n'ọbochi Nyenwe aị.

⁶ Anụ méma oknomokno, kwnornu nù nhne whụ brẹdi matị neeme kpakara brẹdi whụ ọwhu. ⁷ Anụ gweme mmehie ke nù lele nhne whụ brẹdi ọknani ma anụ ziri rịchna. Nga wam, anụ jọonu lele brẹdi ikne ke nwée nhne whụ brẹdi, lele kpa anụ kwesiri. Kwnornu nù be jiri Karaịsi Nnwọ Atnurnu Ọgawhe aị kwanụ aị ariọhna. ⁸ Ngwa ma a bita Iriri ka, ọ búo hite nù nhne whụ brẹdi ke mmehie ọknani nù risi rikne, kọvu brẹdi ke nwée nhne whụ

brẹdi nù rime a, brẹdi ke zì rìchna ke nwernu ezi òka nù rime a.

⁹ M gbannù m anù òkwukwo, anù nù ele neeme òyi mékòta nhne. ¹⁰ M zá m nookwu gbasìri ele neeme òyi k'òwa, ele òwho-anya nù ele buznu nù ele naakwa rẹnwu. Ò bụru kpam, anù jọowhoga n'òwa. ¹¹ Kọvu m naagbanù anù kịtna, naakaa, anù nù nye òbula ke kwuru ẹhni a nnwọ nda, kọvu o neeme òyi, ke nwernu òwho-anya, nye naakwa rẹnwu, mọbu nye naakaja badnù, nye okne manya, mọbu nye buznu mékòta nhne. Anù nù nye wam dázìkota ẹlì ri wiri.

¹² Ò zá m mkpa me kpe ele zì n'ederezi ikpe. Ò búo anù kwesiri o kpe ele zì n'esilawùru anù ikpe?

¹³ Chiokike jeekpe ele zì n'ederezi ikpe. Lele kpa òkwukwo nsọ kwuru, “Anù chìhala badnù ojo wam n'esilawùru anù.”

6

O kwuru badnù zne

oro ikpe

¹ Ò bụru nù otu badnù nwernu nhne megidne nnwọ nda, ì ga ọla gba nnwọ nda ì òkwukwo n'oro ikpe, ele máa Chiokike kpe be ikpe, tñnuma, o jookwuru a zne n'esilawùru rụmu Chiokike? ² Anù máa nù rụmu Chiokike jeekpe ọwa ikpe sa? Ò bụru nù anù jeekpe ọwa ikpe, anù nwée rikne kpe ikpe òka matì n'esilawùru anù? ³ Ò bụ nù anù máa nù a jeekpe ele enine izi ikpe? Ò kọ bụru nhne ke bụdnu ka. ⁴ Ò bụru nù òka dnarnù ke gbasìri bụdnu ka, kịni mernu anù neekwe ele zì n'ederezi kpe anù ikpe? Ele ikpe ka bụ ele nwée ọso anya n'ògbako Chiokike. ⁵ Iwhnerne tų anù. M kweru m nù otu badnù ke

nwernu akoniche zị n'esilawuru anụ, nye jeenwe rikne kpe ikpe n'esilawuru rụmu nda. ⁶ Tnụnuma, otu nnwọ nda jookwuru nnwọ nda berere zne n'oro ikpe ma ele kwé ekwe kpe be ikpe.

⁷ Anụ naagbarịta ẹhni anụ okwukwo n'oro ikpe, ka neegesi nụ anụ dnarnụ adna. O jáaka mma nụ i bụ nye be mejoru? O jáaka mma nụ nhne whunahoru i? ⁸ Tnụnuma, anụ neeme ibne nhne ojo, anụ znunahoru nnwọ nda anụ nhne. ⁹ O bụ nụ anụ máa nụ ele ojo jéekheja ẹli-eze Chiokike? Anụ dúwhu ẹhni anụ, ele naagba ewhere, mọbu ele naakwa renwu, mọbu ele neeme oyi, ele rukna naadnanyi ele rukna ibne be, ¹⁰ mọbu ele buznu, mọbu ele owho-anya, mọbu ele okne manya, mọbu ele naakaja badnụ, mọbu ele nọoghogbu ele badnụ jéekheja ẹli-eze Chiokike. ¹¹ Agwna anụ nụ kpam nụ mbom. Kọvu be snumarnu mmehie anụ, be gweru anụ nye-whete n'aka Chiokike. Be mernu anụ nụ Chiokike ziri n'udno hite nụ rewhna Nyenwe aị Jizosi Karaisi nụ Enine ke Chiokike aị.

Kwasinu Chiokike igwugwu

¹² “M nwernu m rikne mee kpakara nhne.” Kọvu o búo kpakara nhne naabna mbnarna. “M nwernu m rikne mee kpakara nhne.” Kọvu m jóobu ohi nhne obula. ¹³ “Wiri zinu ruwho, ruwho zị masinu wiri.” Kọvu Chiokike joolulu kpakara be. Be jéji ẹhni badnụ neeme oyi, kọvu kpenu Nyenwe aị, Nyenwe aị jeeme ẹhni badnụ nwehja nhne zị mkpa. ¹⁴ Chiokike nye mernu Nyenwe aị hi n'ẹnwu lizọ, o jeeme masi anọ-ẹhni aị hi n'ẹnwu lizọ hite n'iknema a. ¹⁵ O bụ nụ anụ máa nụ

ẹhni anụ bụ nhne zị n'ẹhni Karaisi? M jeegweru nhne zị n'ẹhni Karaisi mee be bụru nhne zị n'ẹhni nyerinya ewhere? Óza rịa rịa. ¹⁶ Ọ bụ nụ anụ máa nụ nye gweru ẹhni a yisi n'ẹhni nye ewhere, ya nụ a ghọlam otu anọ-ẹhni? Kwnornu nụ ọkwukwo nsọ kwuru, “Be lawuru jọburu otu anọ-ẹhni.” ¹⁷ Kọvu nye gweru ẹhni a yisi nụ Nyenwe aị, ya nụ Nyenwe aị ghọlam otu n'enine.

¹⁸ Anụ gbanahoru ome ọyi. Kpakara mmehie berere badnụ mernu zị n'olu ẹhni, kọvu nye neeme ọyi megidnernu ẹhni a mmehie. ¹⁹ Ọ bụ nụ anụ máa nụ ẹhni anụ bụ Oro Nsọ ke Enine Nsọ, nye wu nụ rime anụ, ke Chiokike nyernu anụ? Anụ nwée ẹhni anụ, Chiokike nwe anụ. ²⁰ O jiri ọnu ahia gbahia anụ. Anụ gweru ẹhni anụ kwasịnu Chiokike igwugwu.

7

Ajiji gbasiri olulu nzi nụ nnwerne

¹ Nhne gbasiri nhne anụ gbarụ n'ọkwukwo, “Ọ bụru ọma nụ nyerukna nụ nyerinya dnányi lele nzi nụ nnwerne.” ² Kọvu kwnornu nụ agịda ele neeme ọyi zị n'esilawuru anụ, ọ bụru ọma nyerukna ọbula luru nnwerne ke aka a, nụ nyerinya gbọru nzi ke aka a. ³ Nyerukna ọbula mee nhne kwesiri a lele nzi hne nnwerne a zị, nyerinya ọbula mee nhne kwesiri a lele nnwerne hne nzi a zị. ⁴ Nnwerne nwée rikne hne ẹhni a zị, kọvu nzi nwernu, kpm masị nzi nwée rikne hne ẹhni a zị, kọvu nnwerne a nwernu. ⁵ Anụ gónahoru ẹhni anụ ẹhni anụ, okwolem ma ọ bụ ige matị kpa anụ kwekọtaru,

ma anụ vu ọnu nụ kpe okpukpe. Omekwo, anụ ziri n'otu berere ma Ekwensu gharu ọ rna anụ ọrnurna, kwnornu nụ anụ nwée rikne jikwaru ẹhni anụ. ⁶ Ka bụ rikne me neenye anụ, ọ bụo iwu. ⁷ N'ezị ọka, ọ jaamasị m nụ kpakara badnụ jaadazị lele me. Kọvu nye ọbula nwernu nkesi ke Chiokike kesiri, otu nyenum kpa, nye berere nkesi berere.

⁸ Kịtna, m naakanụ ele lúge nnwerne mọbu ele gbóge nzi, mọbu ele rinya nzi be nwurnu, ọ jaaka mma anụ daziri etekne, lele kpa me daziri. ⁹ Kọvu ọ bụru nụ anụ jéenwe rikne jikwaru ẹhni anụ, anụ luru nnwerne mọbu gbọru nzi. Ọ ka mma ọ luru nnwerne mọbu gbọru nzi, tnunuma ẹhni anụ jeeerne bẹkwnu.

¹⁰ Ele nwernu nzi mọbu nnwerne, m neenye anụ iwu Nyenwe aị, ọ bụo ke m. Nnwerne gbákwadia nzi a nnam. ¹¹ Kọvu, o mee kpam, ọ jaadaziri etekne mọbu ọ lahna ke nzi a, nzi gbákwadia nnwerne a nnam.

¹² M naakanụ ele ke gwnarnụ, ọ bụo Nyenwe aị, ọ bụru nụ nye Karaịsi ọbula nwernu nnwerne ke kwé ekwe, kọvu o kweru ya nụ a wugidne, ọ gbála a nnam. ¹³ Ọ bụru nụ nyerinya Karaịsi ọbula nwernu nzi ke kwé ekwe, kọvu nzi a kweru ma be wugidne n'otu, ọ gbála a nnam. ¹⁴ Kwnornu nụ Chiokike nabnanyarnụ nzi ke kwé ekwe kwnornu nnwerne a ke kweru ekwe. Chiokike naabanyarnụ nnwerne ke kwé ekwe kwnornu nzi a ke kweru ekwe. Ọ bụru nụ ọ bụo kpam, rumu takiri anụ jọburu ele zila rịchna, kọvu be zị nsọ kịtna.

¹⁵ Kọvu ọ bụru nụ ọ masiri nye ke kwé ekwe ọ gba nnam, o mee kpam. Ọ zá iwu ke ji nye Karaịsi, nzi mọbu nnwerne, n'ọnodi nụ kpa. Chiokike sukwuru

aị ma a wuru n'udno. ¹⁶ Ndaa kpa i jiri mahia, jị nnwerne ke kweru ekwe, nụ ị jọoznohia nzi i? Mọbu jị nzi ke kweru ekwe, ndaa kpa i jiri mahia nụ ị jọoznohia nnwerne ị?

*Daziri n'ọnodi
Chiokike sukwuru i*

¹⁷ Kọvu nye ọbula daziri n'ọnodi ọ zị nga Chiokike sukwuru a, bụ ke Chiokike nyernu a. Ka bụ nhne me neezni nụ rime kpakara ọgbako Chiokike. ¹⁸ Ọ bụru nụ nye be kparụ nka nurnu ikwu Chiokike, o gwépuke nhne atụ ọkpa nka a. Ọ bụru masị nụ nye be kpáge nka nurnu ikwu Chiokike, be kpála a nka. ¹⁹ Ọkpa nka nụ be kpáge nka zá nhne ọ bụ, nhne zị mkpa bụ ọbita iwu Chiokike. ²⁰ Badnụ ọbula daziri n'ọnodi ọ zị nga Chiokike sukwuru a. ²¹ Ị zị n'ọhi nga Chiokike sukwuru i? O mékpa ị ẹhni, kọvu ọ bụru nụ ị nwernu oghere ọ whọga n'ọhi, mee kpam. ²² Kwnornu nụ nye bụ ọhi nga Nyenwe aị sukwuru a bụ nye nwernu ẹhni a nụ rime Nyenwe aị. Kpam masị, badnụ ke nwernu ẹhni a nga Nyenwe aị sukwuru bụ ọhi Karaịsi. ²³ Chiokike ji ọnu ahia gbahia anụ, anụ ghọko ọhi ke badnụ. ²⁴ Rụmu nda m, badnụ ọbula daziri n'anya Chiokike n'ọnodi ọ zị nga Chiokike sukwuru a.

*Ele nwée nzi
mọbu nnwerne*

²⁵ Nhne gbasiri ele rinya máa nyerukna, mọbu ele rukna máa nyerinya, m nwée m nhne Nyenwe aị nyernu n'iwu, kọvu m neenye anụ nhne bụ echiche m, nye hite n'obirizi ke Nyenwe aị m kwesiri m ọtukwasi ovu. ²⁶ Mkpa karilam n'ọwa kịtna, m che m nụ ọ bụru ọma ọ bụru nụ badnụ

daziri kpa o zi. ²⁷ O buru nu i nwernu nnwerne? I ghásala a. I nwée nnwerne sa? I lúko nnwerne. ²⁸ O buru nu i luru nnwerne o zá mmehie i mernu. O buru nyerinya máa nyerukna gbọ nzi, o zá nhne ojo o bu. Kọvu ele nwernu nnwerne mọbu nzi jeenwe agida mkpa n'owa ka, m noopio o dọhia anu nu nhne ka.

²⁹ Rumu nda m, nhne me nookwu bu ka, ige wam zi ndundu, hite kitta ele nwernu nnwerne ziri lele nu be nwée nnwerne, ³⁰ ele naakwna ekwna lele nu be zá n'anya-mini, ele nọomu rumu lele nu oву zá nọoso be n'onu, ele nọozu ahia lele nu o zá nhne be zuhiaru, ³¹ ele ji nhne owa ka lele nu o zá be mkpa. Kwnornu nu owa ka n'onodi a jaagawhe.

³² M noopio ma nhne obula gharu o kpakna anu ehni. Nyerukna obula ke nwée nnwerne neeche echiche gbasiri ernu Nyenwe ai, kwnornu nu o pioru o mee nhne jaamasị Nyenwe ai. ³³ Kọvu nyerukna ke nwernu nnwerne neeche echiche gbasiri nhne ke owa ka, kwnornu nu o pioru o mee nhne jaamasị nnwerne a, ³⁴ ke nọodoghari a n'apna lawuru. Nyerinya ke nwée nzi mọbu ke máa nyerukna neeche echiche gbasiri ernu Nyenwe ai, kwnornu nu o pioru o gweru ehni a nu enine a nyee Nyenwe ai. Kọvu nyerinya ke nwernu nzi neeche echiche gbasiri nhne ke owa ka, kpa o jeeme nhne jaamasị nzi a. ³⁵ M nookwu nhne ka ma o bnanu anu iru. M zá m noobnosni anu. Kọvu m pioru m ma anu mee nhne buru oma nu ke kwesiri ekwesi, ma anu gweru kpakara ehni anu yisi n'ernu Nyenwe ai, gharu o le anya n'aznu.

³⁶ Nhne ke gbasiri ele kwekotaru olulu, o buru nu badnu obula whnurnu nu o zá naakpakwa agwa

nkari hne nyerinya o kweru o lu zi, o buru n'awha neezne, o luru a, be mege mmehie. ³⁷ Kovu hne badnu kpebiri n'ovu a, o za nye naamagidne a nu o jobu nnwerne, o nwernu rikne gharu o lu nnwerne wam, o mernu nhne kwesiri. ³⁸ Nye ke luru nnwerne mernu nhne oma, kovu nye ke luge ria ria mekakworu nu nhne oma.

³⁹ Nyerinya gboru nzi zi n'iwu kpa nzi a zi budnu, kovu hne nzi a nwurnu, o za iwu ji a ma o gboru nzi berere. Kovu o jobu nye magwu Nyenwe a. ⁴⁰ Kovu n'echiche m, ovu joso a n'onu o buru o daziri etekne. M che m nu m nwernu m Enine Chiokike.

8

Wiri be jiri kwanu renwu ariohna

¹ Nhne ke gbasiri wiri be jiri kwanu renwu ariohna, o bu n'ezi nu, "Kpakara a nwernu nhne omuma." Kovu nhne omuma neegweya badnu vulizo ehni a olu. Owhnun'anya noowulizo badnu olu lele oro. ² O buru nu badnu obula neeche nu o magwu nhne, o ma kpa o kwesiri o mahia. ³ Kovu Chiokike magwu ele whurnu a n'anya.

⁴ Nhne gbasiri wiri be jiri kwanu renwu ariohna, a magwu nu o za nhne renwu ke owa ka bu, kwnornu nu chi berere za, okwolem Chiokike kpoi. ⁵ O bubedi nu agida nhne be nookwu "chi" zi n'oligwe mobu n'owa, o bu n'ezi nu be zi agida "chi" nu "nyenwe," ⁶ kovu hne a zi, otu Chiokike kpoi nye bu Nda. O keru kpakara nhne, a zinu a budnu. Otu Nyenwe a Jizosi Karaisi zi, nye be hiri n'aka a ke kpakara nhne, nye a zi budnu n'aka a.

⁷ Kọvu ọ búo kpakara badnu magwu ezi oka ka. Agwna badnu yiri risi nu renwu du kitna, nga be riri wiri ki, be neeche nu be ji a kwanu renwu ariohna. Echiche ovu be za rikne, wiri be riri kparu be. ⁸ Kọvu wiri jeeme ai nu Chiokike ziri ndundu. A rile wiri, ọ za nhne o neegweme n'ehni ai, a ri wiri ọ za nhne o neeyisi ehni ai.

⁹ Kam kpayaru, anya du anu eli, i kwekwadia oghere i nwernu nu ome kpa ọ masiri i mee ele za rikne n'okwnata ovu dnabna nu mmehie. ¹⁰ Ọ buru nu otu badnu ke mkpoma sile rikne whnuru i hne i dazi eli neeri wiri n'oro renwu, kwnornu nu i nwernu “nhne omuma,” o jeenye a mkpoma siri rikne o ri nhne be jiri kwanu renwu ariohna? ¹¹ Nnwọ nda wam za rikne, nye Karaisi kwnornu nu a nwuma, joowhu etekne kwnornu nu nhne omuma i. ¹² Kpam, anu mehieru nnwọ nda anu wam za rikne, lulu ovu a, anu mehielem Karaisi masi. ¹³ Ọ buru nu wiri me jeeri jeeme nnwọ nda m mmehie, m jeeri okpna rira rira kpa me zi budnu, ọ zi me mee nnwọ nda m dnabna nu rime mmehie.

9

Rikne nu ọnu ke nye izi

¹ Ọ bu nu m nwée m ehni sa? Me búo nye izi sa? Me whnúge Jizosi Nyenwe ai anya? Anu búo nhne me rnuhiaru n'ọnu Nyenwe ai? ² Ọ buru nu ele berere whnúge m lele nye izi, anu magwu nu m bu m nye izi. Anu bu nhne atu ke neegesi nu m bu m nye izi Nyenwe ai.

³ Nhne me naakanu ele nookwulu m bu ka, ⁴ a nwée rikne ri wiri mobu nwọ mini n'ọnu ai sa?

⁵ A nwée rikne mee nhne ele izi berere neeme?

A nwée rikne luru otu nnwọ rinya Karaisi lele nnwerne, o snornu aị zne izi lele ele izi ele berere nụ rumu nne Nyenwe aị nụ Pita? ⁶ Okwokola me nụ Banabasị kwesiri ọ rnu ọnu si a ri wiri?

⁷ Ndaa nye ọgwu ke nọolu ọgwu hite n'iwai ke hi nụ rẹkpa a whuya? Ndaa nye jọornu ẹkwu, ma o jéeri mkpuru hi nụ rime ẹkwu a? Ndaa nye nọoznu atnuru ma ọ zá nọonwo mini-rẹma atnuru a? ⁸ Me nookwu lele badnụ etekne sa? Ọ bụo nhne Iwu aị kwuru sa? ⁹ Kwnornu nụ be gbarụ n'ọkwukwo Iwu Mozizi, "I knésni ọnu ehni ke nọzosna ikpa." Chiokike o nookwu nhne gbasiri ehni kpọi? ¹⁰ O kwuru nhne ka kwnornu aị. Be gbarụ a n'ọkwukwo kwnornu aị, nụ nye nọotu ọnu-ẹli nụ nye nọzosna mkpuru nwernu ọkwnata ovu nụ be jeeri mkpuru hiri n'ẹkwu. ¹¹ A kpasiri mkpuru ke enine nụ rime anụ, ọ bụo nhne kwesiri nụ a jọghoru mkpuru etekne n'ehni anụ? ¹² Ọ bụru nụ ele berere nwernu rikne kpa hne anụ zi, ọ bụ ayila jéenwe rikne karukwo hne anụ zi?

Kọvu a mége kpam, a nwernu ndidi nụ kpakara nhne, ọ zi a bita nhne ọkpobi ọchi n'apna izi ọma Karaisi. ¹³ Ọ bụ nụ anụ máa nụ ele nọornu ọnu n'Oro Nsọ neeri nhne hi n'Oro Nsọ whuya? Ọ bụ nụ anụ máa masi nụ ele nọornu ọnu n'ọjo ariohna neeri agwna nhne be jiri kwa ariohna? ¹⁴ Kpam masi, Chiokike nyernu iwu nụ ele neezni izi ọma be ri wiri hiri n'izi ọma whuya.

¹⁵ Kọvu m mége m kpam. M zá m naagba ọkwukwo ka ma m nwernu rikne mee kpam. Kwnornu nụ ọ jaakanụ m mma me beru ọsno nwuma ẹnwu tna, ọ zá nye mee igwugwu m nhne etekne. ¹⁶ M nwée m rikne nyaa risi nụ m neezni

izi ọma. Mkpá naakpa m bú o zni izi ọma. Owe! Ọvu ọnu zinu m ọ búru nù m zni ige m izi ọma. ¹⁷ Ọ bú me gweru mkpọma m zni izi ọma ka, m nwernu m ọgwo ẹnu, kọvu ọ búru nù jíge m mkpọma m zni izi ọma, m nọornu ẹnu Chiokike yisiri m n'aka. ¹⁸ Ọ búru kpam, kini bú ọgwo ẹnu m? Ọ bú oghere o zni izi ọma gharu ọ whnu ọnu ahia, gharu o gweru rikne me nwernu n'izi ọma mee nhne.

¹⁹ Ọ bú n'ezí nù m búo m ọhi nye ọbula, m nwernu m ẹhni, kọvu m mernu m ẹhni ọhi kpakara badnu ma m rihia m agida badnu n'iru. ²⁰ Hne ele Ju zi, m bú m nye Ju ma m rihia m ele Ju. Hne ele zi nù mkpururu iwu zi, m ziri lele nù m zi m nù mkpururu iwu (ọ bú n'ezí nù m zá m nù mkpururu iwu), ma m rihia m be n'iru. ²¹ Hne ele zá nù mkpururu iwu, m ziri lele nye zá nù mkpururu iwu (ọ bú n'ezí nù m léwhule m iwu Chiokike anya, m zi nù mkpururu iwu Karaisi), ma m rihia m be n'iru. ²² N'esilawuru ele zá rikne n'okwnata ovu, m nù m lele be, ma m rihia m be n'iru. M bú m kpakara nhne hne ele badnu zi, m neeme kpa me nwernu rikne, ma m rihia m agwna be n'iru. ²³ M neeme kpakara nhne ka kwnornu izi ọma, ma m kehia m igwe nù ngozi a.

²⁴ N'ezí ọka, anu magwu nù ele naagba eso naagba eso n'otu, kọvu otu badnu kpoi naagbahia nhne eso. Anu gba eso, ma anu gbahia nhne n'eso.

²⁵ Nye ọbula ke naagba eso jooknekwaru ẹhni a nkari, ma be kpusi a okpu ọ gbahiaru n'eso ke jaazi okwnukokwnu, kọvu a naagba eso ma a nwehia okpu-eze ke jaazi okwnukokwnu. ²⁶ Ka kpahiaru m zá m naagba eso lele nye ọ zá nhne o vu nù mkpọma, m zá m nọolo igbakwu lele nye nọolo

ruwhere igbakwu. ²⁷ M naata ẹhni m awhnuwhnu ma m nwernu m rikne nẹchi a, ọ zị me znikpa ele berere izi ọma, m bụru nye kwésile okpu-eze wam.

10

Ọ dọ aka nụ nsị gbasiri

Okwa renwu

¹ Rumu nda m, m pioru m anụ mahia, nhne mernu ele nda aị ọknani ele snornu Mozizi kpa be zị nụ mkpururu erumeru, kpakara be gawheru Osimini Ihie. ² Be wuru be mini nụ rime erumeru nụ osimini ke neegesi nụ be sno Mozizi. ³ Kpakara be riri otu wiri enine wam. ⁴ Kpakara be nwọrnu otu mini enine wam, kwnornu nụ be nwọrnu mini enine ke hiri nụ rugwu wam snornu be, rugwu wam bụ Karaisi. ⁵ Kọvu nhne gbasiri agwna be sọge Chiokike ovu n'ọnu, iznu be wusaru n'ẹli-ikpa wam.

⁶ Kpakara nhne ka bunnu aị nhne atụ ke nọodo aị aka nụ nsị. Nhne ojo gwnuko aị lele kpa ọ gwnurnu be. ⁷ Anụ kwakọ renwu lele kpa agwna be kwaru, lele kpa okwukwo nsọ kwuru, “Ele wam daziri ẹli ri nhne, nwọ nhne onwunwo, be lizọ tne eri.” ⁸ A mékọ ọyi, lele kpa agwna be mernu, nri pokwu lawuru nụ pokwu ẹto nwu otu obochi. ⁹ A kpakọ Nyenwe aị iru, lele kpa agwna be mernu, agwọ tagbu be. ¹⁰ Anụ támu, lele kpa agwna be tamurnu, enine izi ke ẹnwu gbu be.

¹¹ Kpakara nhne ka mernu be nụ lele nhne atụ, be gba be n'okwukwo nsọ, ma be bụru nhne jeezni aị ezni, aị ele zị budnu n'okwukwo ọwa ka. ¹² Nye ọbula ke neechi nụ o gwuzogwu kwem, ledu anya, ọ zị ọ dna. ¹³ Ọ zá ọrnurna ke vakwnusiri

anụ ke wákwusilele badnụ. Kọvu Chiokike kwesiri be kwnata a oву, o jéekwe ọrnurna ke anụ nwée rikne gwuzoli vakwnusi anụ. Kọvu nga be naarna anụ ọrnurna, Chiokike jeenye anụ rikne o gwuzo, gbamanụ anụ apna anụ jeeji whụya nụ rime a.

¹⁴ Nhne atụ ele ka neegesi, ele me whnụnu n'anya, ma anụ ghanahọru ọkwa ẹnwu. ¹⁵ M nookwunu anụ ọka lele ele nwernu akoniche, anụ tulekọm nhne me nookwu. ¹⁶ Okiko Iriri Nso wam ke a nọtunu Chiokike mmamma, ọ búo ọvnarna Karaisi nhne a neekeri nga a nọonwo nhne hi n'okiko wam? Brẹdi wam a naanyawa, a zá neekeri anọ-ẹhni Karaisi nga a neeri brẹdi wam? ¹⁷ Kwnornu nụ otu brẹdi zinu kpakara aị. Ọ bú n'ezi nụ a zị agida, kọvu a bú otu anọ-ẹhni, a neeri otu brẹdi wam.

¹⁸ Anụ tule ele Izireli, ele neeri nhne be jiri kwa arịohna, neekerikọta nhne n'otu n'ọjo arịohna Chiokike. ¹⁹ Ndaa nhne me nookwu? Ọ bú nụ ẹnwu mọbu wiri be kwanụ ẹnwu arịohna bú nhne ọbula? ²⁰ Óza! Nhne me naakaa bú nụ nhne ele naakwanụ ẹnwu kwarụ arịohna bú nhne be kwannụ ele ẹnwu ojo. Ọ búo Chiokike. M chíoge m anụ nụ ele ẹnwu ojo neekeri nhne n'otu. ²¹ Anụ jéenwe rikne nwọ okiko Nyenwe aị, nwọ kwno okiko ele ẹnwu ojo. Anụ jéenwe rikne ri wiri n'ikpechi Nyenwe aị, ri kwno n'ikpechi ẹnwu ojo. ²² Anụ noopio o mee Nyenwe aị kwno awụwa? A nwernu iknernema karụ a sa?

²³ “A nwernu rikne mee kpakara nhne,” kọvu ọ búo kpakara nhne búru ọma. “A nwernu rikne mee kpakara nhne,” kọvu ọ búo kpakara nhne nọowulizo badnụ olu lele ọro. ²⁴ Ọ zá nye lebna

anya nụ nhne ke a, kọvu nụ nhne ọma ke jeenyinu ele berere aka.

²⁵ Anụ ri nhne ọbula be neere n'ahia, anụ sịkwa ajiji kwnornu mkpuru ovu anụ. ²⁶ Okwukwo nsọ kwuru, “Chiokike nwe ọwa nụ kpakara nhne zị nụ rime a.”

²⁷ Ọburu nụ nye kwé ekwe sukwuru anụ ma anụ ri wiri, ọ masị anụ o zne, anụ ri nhne ọbula ọ bítaru nụ ruwhnu anụ, anụ sịkwa ajiji ọbula kwnornu mkpuru ovu anụ. ²⁸ Kọvu ọ buru nụ otu badnụ kanụ anụ, “Be jiri wiri ka kwanụ renwu ariohna,” anụ ríko wiri wam kwnornu nụ nye wam kannụ anụ kpa, ma kwnornu masị mkpuru ovu. ²⁹ Ọ búo kwnornu mkpuru ovu anụ, kọvu mkpuru ovu nye berere wam. Ndaa kpa rikne me nwernu o mee nhne jiri gbasị mkpuru ovu nye berere? ³⁰ Ọ buru nụ me ri wiri tũnu Chiokike mmamma, kịni mernu nye berere jaama m ikpe nụ wiri me tũru mmamma?

³¹ Kọvu, nhne ọbula anụ neeme, anụ neeri wiri mọbu anụ nọonwo mini, anụ mee kpakara nhne kwnornu igwugwu Chiokike. ³² Anụ méko nye ọbula dna, mọbu nye Ju mọbu nye búo nye Ju, mọbu ọgbako Chiokike, ³³ lele kpa me naagbalị o mee kpakara nhne jaamasị kpakara badnụ. M zá m neeche nhne gbasiri nhne ọma ke m, kọvu nhne ọma agida badnụ ma be znọhia be.

11

¹ Anụ snornu m lele kpa me noosno Karaịsi.

*Okpukpe nụ ọgbako
Chiokike*

² M naaja anụ mma kwnornu nụ anụ neechenwanya m, naabita kpakara nhne me znirni anụ. ³ Kĩta, m piuru m anụ ghohia nụ Karaịsi bu risi nyerukna obula, nzi bu risi nnwerne, Chiokike bu risi Karaịsi. ⁴ Nyerukna obula ke neekpe okpukpe mọbu nọokpo okwo izi oma Chiokike kpusnime risi a, bu nhne iwhnerne nyee Karaịsi. ⁵ Nyerinya obula ke neekpe okpukpe mọbu nọokpo okwo izi oma Chiokike, gbesa risi a anya, neeme risi a nhne iwhnerne, o nụ lele o kọpuru rukeri-ize risi a. ⁶ O buru nụ nyerinya kpúsnige risi a, o koma rukeri-ize a. Kọvu o bu nhne iwhnerne nụ nyerinya jọoko rukeri-ize a, o kpusi risi a. ⁷ Nyerukna kpúsní risi a kwnornu nụ o bu oiyi ke neegesi igwugwu Chiokike. Kọvu nyerinya neegesi igwugwu ke nyerukna. ⁸ Kwnornu nụ Chiokike híge nụ nyerinya kpu nyerukna, kọvu hiri nụ nyerukna kpu nyerinya. ⁹ O kpúge nyerukna kwnornu nyerinya, kọvu o kpuru nyerinya kwnornu nyerukna. ¹⁰ Kam kpayarụ, kwnornu ele enine izi, nyerinya kwesiri o kpusni risi a, ke neegesi o zi nụ mkpururu nzi a.

¹¹ Lele kpa budnu nụ rime Nyenwe aị zi, nyerinya zi nyerukna mkpa, nyerukna zi masi nyerinya mkpa. ¹² Kwnornu kpa be kpuru nyerinya hite nụ nyerukna, kpam masi, nyerinya murnu nyerukna. Kpakara nhne hi n'aka Chiokike va. ¹³ Anụ kpekọm ma o buru oma nụ nyerinya jeekpe okpukpe gbesa risi a anya. ¹⁴ Iwu okike kwuru nụ nyerukna ke nwernu ogologo rukeri-ize bunu a nhne iwhnerne. ¹⁵ Kọvu o buru nụ nyerinya ke nwernu ogologo rukeri-ize, o bu igwugwu a, kwnornu nụ rukeri-ize a bu nhne Chiokike ny-

ernu, o jeeji nookpusni risi a. ¹⁶ Kọvu ọ bụru nụ nye ọbula kwége kpam, nhne me jaakaa bụ, aị mọbu ọgbako Chiokike nwée omen'ẹli berere karu kpam.

Wiri Anyasnu Nyenwe aị

(Mat 26:26-29; Mak 14:22-25; Luk 22:14-20)

¹⁷ Gbasiri nhne ke a nookwu kịtna, m jáaja anụ mma. Nhne anụ neeme nụ rime ọgbako anụ bụ nhne ọjo, ọ bụo ọma rịa rịa. ¹⁸ Ke mbom, be kannu m nụ agida okewa zi n'esilawuru anụ, m neekweru agwna a. ¹⁹ O dnornu m anya nụ okewa jaaziri n'esilawuru anụ ma nye zi snam whuya iwhne. ²⁰ Nga anụ vakotaru n'otu, anụ váge o ri Wiri Anyasnu Nyenwe aị. ²¹ Kpa anụ neeri, nye ọbula neeri, ọ zá nye neese ibne a. Kam kpayaru wiri nọogwnu agwna badnu nga manya noogbu ele berere. ²² Anụ nwée ọro, hne anụ jeeri wiri, nwọ manya? Anụ neeledna ọgbako Chiokike anya, kpasị ele nwée nhne iwhnerne? Ndaa nhne anụ pioru me kwu gbasiri nhne ka? Me ja anụ mma sa? Ọza! M jáaja anụ mma rịa rịa.

²³ M nahiaru m nhne me znirni anụ n'aka Nyenwe aị Jizosi. N'abalị wam be reru a, Nyenwe aị Jizosi gweruru brẹdi, ²⁴ tūnu Chiokike mmamma, nyawa a, kaa, “Ka bụ anọ-ẹhni m ke zinu anụ, anụ neeme ka neechenwanya m.” ²⁵ Kpam masi, nga wiri anyasnu whemernu, o gweru okiko, kaa, “Ka bụ okiko ọgba-njọ-ẹhni ikne ke ọvnarna m. Nga ọbula anụ nọonwo a, anụ neeme ka neechenwanya m.” ²⁶ Kpa anụ neeri brẹdi ka, nọonwo okiko ka, anụ nookwusa ẹnwu Nyenwe aị tem ọ va.

27 Ka neegesi nù ọ bụru nù nye ọbula ri brẹdi Nyenwe aị mọbu nwọ nhne hi n'okiko, kpa o kwésige, ikpe anọ-ẹhni Nyenwe aị nù ọvnarna a naama a. 28 Nye ọbula beru ọsno nyosnama ẹhni a su o ri brẹdi wam mọbu nwọ nhne hi n'okiko wam. 29 Kwnornu nù nye ọbula ke jeeri mọbu nwọ nhne hi n'okiko wam hne ọ máa anọ-ẹhni Nyenwe aị, neeri, nọonwo ikpe nù risi a. 30 Kam kpayarụ, agida anụ zị nù nriria, agida anụ zá rikne, ele berere nwunam. 31 Ọ bụru a beru ọsno nyosnama ẹhni aị, Chiokike jéekpe aị ikpe. 32 Kọvu Nyenwe aị neekpe aị ikpe, naata aị awhnụwhnu, ma a gharụ o sno ele zị n'ọwa bụru ele ikpe marnụ.

33 Rumu nda m, nga anụ gbakọru n'otu neeri wiri Nyenwe aị, anụ sete ibne anụ. 34 Ọ bụru nù wiri nọogwnu nye ọbula, o ri wiri n'oro a, ọ zị ikpe Chiokike ma anụ kpa anụ gbakọru n'otu.

M jeemekwata nhne ke berere nga me varụ.

12

Nkesi ke Enine Nso

1 Rumu nda m, nhne gbasiri nkesi zị ọdo n'odo ke Enine Nso, m pioru m anụ mahia nhne gbasiri be. 2 Anụ magwụ nù nga anụ bụ ele naakwa renwu ke dnarnụ mgbu, be duru anụ hie apna. 3 M neeme ma anụ mahia nù ọ zá nye Enine Nso Chiokike noodu jeenwe rikne kaa, “Kọsna Jizọsi.” Ọ zá nye jeenwe rikne kaa nù, “Jizọsi bụ Nyenwe aị,” okwokọlam ma Enine Nso hiri n'ọnu a kwu kpa.

4 Agida nkesi enine zị ọdo n'odo, kọvu otu Enine Nso. 5 Agida apna be jeezne izi, kọvu otu Nyenwe

ai. ⁶ Agida ẹrnu zi ọdo n'odo, kovu otu Chiokike wam neenye rikne be jeeji nọornu ẹrnu.

⁷ Enine Nso nyernu badnu obula nkesi ma o buru mbnarna kpakara badnu. ⁸ O nyernu otu badnu izi akoniche, nyee nye berere izi oghohia nhne hite n'otu Enine wam. ⁹ Otu Enine wam nyee nye berere okwnata ovu, o nyee nye berere rikne o gwọ nriria. ¹⁰ Enine wam masi nyee otu badnu rikne o rnu ẹrnu ndu-ehni, nyee nye berere rikne o kpọ okwo izi oma, nyee nye berere rikne o mahia nhne zi ichne nu hne enine zi ichne ichne, nyee nye berere rikne o kwu oka nu riro zi ichne ichne, nyee nye berere rikne o tuhmasna ikwu-onu. ¹¹ Kovu o bu otu Enine wam nọornu kpakara nhne, o neenye badnu obula nkesi zi ọdo n'odo lele kpa o jiri masi a.

¹² Ehn badnu bu otu. Kovu o nwernu agida nhne zi ọdo n'odo ke knekotaru a n'otu. O bu masi kpa o zi n'anọ-ehni Karaisi. ¹³ Kwnornu nu be jiri otu Enine wu ai mini bna n'otu anọ-ehni. A bu ele Ju, ma a bu ele buo ele Ju, ohi mobu nye buo ohi, be mernu a nwọ otu Enine wam.

¹⁴ O buo otu nhne zi n'ehni badnu, be zi agida. ¹⁵ O buru nu ochi jaakaa, "Kwnornu nu m buła m aka, m buła m nhne zi n'ehni," ki jee me a o gharu o buru nhne zi n'ehni badnu. ¹⁶ O buru nu nsni kaa, "Kwnornu nu m buła m anya, m buła m nhne zi n'ehni," ki jee me a o gharu o buru nhne zi n'ehni badnu. ¹⁷ O buru nu kpakara ehni bu anya anya, ndaa kpa o jonu nhne? O buru nu kpakara ehni bu nsni nsni, ndaa kpa o jonu eknarna nhne? ¹⁸ Kovu Chiokike yisiri kpakara nhne zi n'ehni badnu lele kpa o jiri masi a. ¹⁹ O buru nu kpakara be bu otu

nhne, ndaa hne ẹhni jaazi? ²⁰ Kìtna, agìda nhne zì n'otu ẹhni badnu.

²¹ Kam kpayaru, anya jáakanu aka, “Ì zá m mkpa.” Mọbu risi kanu ọchi, “Ì zá m mkpa.” ²² N'ezi, a jéenwe rikne gwuzoli o buru nu nhne ke zì n'ẹhni ke a neeche nu be zá rikne zila. ²³ Nhne ke zì n'ẹhni aì ke a neeche nu be nwée igwugwu, bu ke a neeledu anya gbasiri be, ele ke tu iwhnerne bu ele ke a ji iwo nookpusni. ²⁴ Ngeri ẹhni aì ke marnu mma a zá neeledu a anya. Chiokike n'iwhuru a yisiri ẹhni aì n'otu, o nyernu nhne zì n'ẹhni ke nwée igwugwu, igwugwu ke kakwo. ²⁵ Okewa kwésile o zì n'ẹhni, kovu kpakara nhne zì ọdo n'ọdo n'ẹhni magwu nhne gbasiri ibne be. ²⁶ O buru n'otu nhne zì n'ẹhni nọowhnu awhnwhnu, kpakara ele ke berere sno a whnu awhnwhnu. O buru be znarni otu, kpakara be sno a nwe ovu oso n'onu.

²⁷ Kpakara anu bu ẹhni Karaisi, anu n'otu n'otu bu nhne zì n'ẹhni Karaisi. ²⁸ Chiokike bitaru kpakara nhne kpa o kwesiri n'ogbako a. O bitaru ke mbom, ele izi, ke ẹbo, ele nọokpo okwo, ke ẹto, ele zni nhne, ele nọornu ẹrnu ndu-ẹhni sno be, nu ele nwernu nkesi ogwo nriria, mọbu ele neeyinu ele berere aka, ele neechi ẹchi, nu ele nookwu oka nu riro zì ọdo n'ọdo. ²⁹ Kpakara be buo ele izi, kpakara be buo ele nọokpo okwo, mọbu ele neezni nhne. O buo kpakara be nwernu rikne rnu ẹrnu ndu-ẹhni, ³⁰ mọbu gwọ nriria zì ọdo n'ọdo, mọbu kwu oka nu riro zì ọdo n'ọdo, mọbu o tuhna ikwu-onu. ³¹ Kovu nkesi ke kakwo mma gwnu anu lele wiri.

Kovu me gesi anu apna ke kakwo mma.

13

Ọwhnun'anya

¹ Ọ bụrụ m nwernu m rikne kwu ọka nụ riro ele badnụ nụ ke enine izi, kọvu m nwée m ọwhnun'anya, ọka m jọburu ọgbugbo etekne mọbu igele waru-awa. ² Ọ bụrụ m nwernu m nkesi ke ọkpo okwo izi ọma, nụ ọghohia kpakara nhne zị omimi, nụ kpakara nhne ọmuma, ọ bụrụ nụ m nwernu m kpakara ọkwnata ovu ke joovume rugwu, kọvu m nwée m ọwhnun'anya, ọ zá nhne me bụ. ³ Ọ bụrụ me nyee ele mboni kpakara nhne me nwernu, mọbu nyee ẹhni m be gba bẹkwnu, kọvu m nwée m ọwhnun'anya, ọ zá ọgwo ẹrnu me jeekehia.

⁴ Ọwhnun'anya nwernu ọsnuta ovu, nụ ovu ọma. Ọwhnun'anya kwnó awuwa, o méé oknomokno, ọ kpá nganga. ⁵ Ọwhnun'anya méé nhne búo ọma n'anya. O píó nhne ke aka ke a, o nwée ovu owe ẹhni. Ọwhnun'anya zá nọogwnu nhne ojo be mernu a. ⁶ Ọwhnun'anya zá nọonwudna nụ nhne ojo, kọvu ezi ọka neeme ovu ọso a n'ọnu. ⁷ Inwe zá nọogwu ọwhnun'anya. O neekweru kpakara nhne, o nwernu olile anya nụ kpakara nhne, o needi kpakara nhne.

⁸ Ọwhnun'anya zị ọkwnukokwnu. Ọkpo okwo jeebi, riro zị ọdo n'odo jọkwusi. Ọ bụrụ ọghohia, be jaagawhe. ⁹ Ọghohia aị nụ ọkpo okwo aị zú ozu. ¹⁰ Nga nhne ke zuru ozu varu, nhne ke zúge ozu jaagawhe. ¹¹ Nga me bụ watakiri, m nookwu ọka lele watakiri, m naari ọriri lele watakiri, m ghohiaru m nhne lele watakiri, kọvu nga me sozuru nụ badnụ, m gweme kpakara agwa watakiri n'ẹhni m. ¹² Kwnornu nụ kịtna, a nọowhnu nhne nụ

nyno ke nọtu ewheke, kọvu nga wam a jọowhnu ruwhnu nụ ruwhnu. Kịtna, m maam agwna nhne, nga wam m jaamakwo kpakara nhne lele kpa Chiokike magwụ m.

¹³ Kịtna, nhne ẹto ka zị, ọkwnata ovu, olile anya, nụ ọwhnun'anya. Kọvu ọwhnun'anya kakwo kpakara be.

14

Ọkpo okwo nụ riro ikne

¹ Anụ snornu apna ọwhnun'anya, nkesi ke Enine nọogwnu anụ lele wiri, ke kakwo ibne a, nkesi ke ọkpo okwo izi ọma. ² Nye nookwu ọka nụ riro zị ichne ichne zá nookwunu badnụ, kọvu Chiokike. Kwnornu nụ ọ zá nye nọoghohia nhne o nookwu, nhne o nookwu bụ nhne tugwaru otugwa hite nụ rikne Enine. ³ Kọvu nye nọokpo okwo izi ọma nookwunu ele badnụ ọka, noowulizọ ele badnụ olu lele ọro, neezni nhne, naakasi mkpọma. ⁴ Badnụ ke nookwu ọka nụ riro zị ichne ichne noowulizọ ẹhni a olu lele ọro, kọvu nye nọokpo okwo izi ọma noowulizọ ọgbako Chiokike olu lele ọro.

⁵ Ọ jaamasị m ọ bụru nụ kpakara anụ jookwu ọka nụ riro zị ichne ichne. Kọvu ọ ka mma, ọ bụru nụ kpakara anụ kpọ okwo izi ọma Chiokike. Kwnornu nụ nye nọokpo okwo izi ọma Chiokike zị okne ọnu ahia kakwo nye nookwu ọka nụ riro ichne ichne, okwolem ma ọ zị nye jọtuhnasnanu ọgbako Chiokike nhne o nookwu, ma be wulizọ ọgbako Chiokike olu lele ọro. ⁶ Ọ bụru me vakwnusi anụ nookwu ọka nụ riro ichne ichne, mbnarna kịni nhne anụ jeenwe n'aka m, okwolem ma m

nookwu nhne Chiokike kpumennu m mọbu nhne ọmuma mọbu ọkpo okwo izi ọma mọbu zni nhne?

⁷ Nhne ke nwée budnu lele opi mọbu ọbo, ọ zá nye jaamahia nhne ọ nọogwnu n'eri ọ bụru nụ be gbúgele a kpa ọ bụru ọma. ⁸ Ọ bụru nụ nye nọogbu ọkwodu gbúgele a nkari, ọ zá nye jeejiknernu o zne ọgwnu. ⁹ Kpam masi, ọ bụru nụ i kwúkwala ọka nkari, ọ zá nye jọoghohia nhne i nookwu, ọ bụru nụ i kwu ọka nụ riro zị ichne ichne. Ruwhere joovu ọka i. ¹⁰ Ọ bụ n'ezị n'agida ikwu-ọnu zị n'ọwa. Ọ zá ke nwée nhne ọ naakasi. ¹¹ Ọ bụru nụ m ghóhiage m nhne badnụ nookwu, m bụnu m nye wam nye ẹli berere, nye wam masi bụnu m nye ẹli berere. ¹² Ọ bụ masi kpa ọ zinu anụ. Hne nkesi ke Enine nọogwnu anụ, anụ gbalị nwehia masi nkesi ke jeewulizọ ọgbako Chiokike olu lele ọro.

¹³ Nye nookwu ọka nụ riro zị ichne ichne, kpe okpukpe ma ọ tũnasna ikwu-ọnu a. ¹⁴ Ọ bụru me kpe okpukpe kpa nụ riro zị ichne ichne, enine m neekpe, kọvu echiche m nwée igwe nụ rime a. ¹⁵ Ndaa nhne me jeeme? M jeeji enine m nụ echiche m kpe okpukpe, m jeeji masi enine m nụ echiche m gwnụ eri. ¹⁶ Kpa i naaznarni Chiokike nụ rime enine, nye izne ke zị nụ rime ọgbako jéenwe rikne kwe Amim, kwnornu nụ o máa nhne i nookwu. ¹⁷ I nọotunu Chiokike mmamma nkari nkari, kọvu nhne i neeme zá noowulizọ nye wam olu lele ọro.

¹⁸ M nọotunu Chiokike mmamma kwnornu nụ m nookwu ọka nụ riro zị ichne ichne kakwo kpakara anụ. ¹⁹ Kọvu nụ rime ọgbako Chiokike, ọ bụru ọma me kwu mkpuru ọka isne ke ele badnụ jọoghohia,

zni be nhne, karu o kwu nri pokwu oka o za nye joughohia.

²⁰ Rumu nda m, anu ghó rumu takiri nu n'oriri anu, kovu anu buru rumu takiri nu hne mmehie zi, anu buru dimkpa nu oghohia anu. ²¹ Be gbaru a n'okwukwo nsọ, kaa,

“M jeeji ikwu-onu ele eli berere,

kwunu ele ka oka,

m jeeji masi mgbele-onu ele eli berere

kwunu ele ka oka,

kovu be kwéle o bnonu m nsni.”

Ka bu nhne Nyenwe a kwuru.

²² Riro zi ichne ichne bu nhne elekema ele kwé ekwe, o buo ke ele kweru ekwe. Okpo okwo izi oma Chiokike bu ke ele kweru ekwe, o buo ke ele kwé ekwe. ²³ O buru nu kpakara ogbako Chiokike gbako n'otu, kpakara anu nookwu oka nu riro zi ichne ichne, o buru ele izne mobu ele kwé ekwe va n'esilawuru anu, be jaakaa nu kpakara anu bu ele era? ²⁴ Kovu o buru kpakara anu nookpo okwo izi oma Chiokike, nye kwé ekwe mobu nye izne va n'esilawuru anu, be jootu a mmehie a n'anya, kpakara nhne o nurnu jaama a ikpe. ²⁵ Nhne tugwaru otugwa ke zi n'ovu a jowhnuya iwhne. O jaadna kpo risi eli nyee Chiokike, kwuhia, “N'ezi oka nu Chiokike zi n'esilawuru anu.”

Okpenu Chiokike

n'ahiri n'ahiri

²⁶ Rumu nda m, nhne me nookwu bu ka, nga anu gbakoru n'otu, anu ji ogwnu eri, anu ji iznizni, nye berere jigwu nhne be kpumennu a, nye berere ji riro zi ichne ichne, nye berere notuhnasna nhne be nookwu. Kpakara nhne bu ma be wulizo ogbako

Chiokike olu lele ọro. ²⁷ Ọ bụru nye ọbula kwu ọka nụ riro zị ichne ichne, be jaazi badnụ lawuru, mọbu ke kakwo ẹto. Otu kwukwo, ibne a kwu, otu badnụ tũhnasna nhne be nookwu. ²⁸ Ọ bụru nụ ọ zá nye jootuhnasna nhne be nookwu, nye wam nookwu nụ riro zị ichne ichne daziri bii, nye wam kwunu ẹhni a ọka, kwu masinu Chiokike ọka. ²⁹ Badnụ lawuru mọbu ẹto kpọ okwo izi ọma Chiokike, ele berere tule nhne be neezni. ³⁰ Kọvu ọ bụru nụ otu dazigwu ẹli nụ rime ọgbako nwehjaru izi n'aka Chiokike, nye nookwu ọka daziri bii. ³¹ Kpakara anụ jeenwe rikne kpọ okwo izi ọma Chiokike otu n'otu, ma kpakara anụ muhia nhne, kpakara anụ nwehia nkasi ovu. ³² Enine nye nọokpo okwo noobnonu nye nọokpo okwo nsni. ³³ Kwnornu nụ Chiokike bụo nye ẹyiriya, kọvu nye udno.

Lele kpa ọ zị nụ kpakara ọgbako Chiokike, ³⁴ ele rinya daziri bii nụ rime ọgbako Chiokike. Be kwú ọka, be bụo ele risi lele kpa Iwu kwuru. ³⁵ Ọ bụru nụ be pioru ọ mahia nhne ọbula, be sika nzi be n'oro. Ọ bụ nhne iwhnerne nụ nyerinya jookwu ọka nụ rime ọgbako Chiokike.

³⁶ Kini masi? Ikwu-ọnu Chiokike ọpanizoru nhne anụ zị sa? Mọbu ọ bụ anụ kpọi bụ ele ọ vakwnusiri? ³⁷ Ọ bụru nụ nye ọbula neechi nụ ọ bụ nye nọokpo okwo izi ọma, mọbu nye nwernu nkesi enine, nye wam marnu nụ nhne me naagbanu anụ n'okwukwo bụ nhne Nyenwe aị nyernu n'iwu. ³⁸ Nye bnóge nsni nụ nhne ka, anụ bnónu a nsni.

³⁹ Rumu nda m, kam kpayarụ, ọkpo okwo izi ọma Chiokike nọogwnu anụ lele wiri, anụ bnósni ele

nookwu ọka nụ riro ichne ichne. ⁴⁰ Anụ gweru ovu dūru ẹli mee kpakara nhne kwesiri n'apna bụru ọma, ma n'ahịri n'ahịri.

15

Olizo n'ẹnwu Karaisi

¹ Kịtna, rụmu nda m, m neechenwanyanụ anụ izi ọma wam me znirni anụ, ke anụ nahiaru, bụ ke anụ gwuzogwu n'olu a. ² Chiokike znohiaru anụ hite n'izi ọma ka, ọ bụru nụ anụ bita nhne me znirni anụ, okwolem ma anụ kweru n'etekne.

³ M nyernu m anụ nhne me nahiaru, ke zị okne mkpa, nụ Karaisi nwurru kwnornu mmehie aị, lele kpa be gbarụ a n'okwukwo nsọ. ⁴ Be liri a, Chiokike mernu o hi n'ẹnwu lizo n'ọbochi ke ẹto, lele kpa be gbarụ a n'okwukwo nsọ. ⁵ O mernu Pita whnụ a anya, omekwo, ele izi nri nụ ẹbo wam whnụ a anya. ⁶ Omekwo, o mernu nhne nụ lele ele kakwo riwhu badnụ isne whnụ a anya otu mgba, ele bụ rụmu nda aị. Agwna be zị bụdnụ dū tna, kọvu agwna be dnarnụ n'anyarna ẹnwu. ⁷ Omekwo, Jemisi whnụ a anya, nụ kpakara ele izi.

⁸ N'ipne-aznụ, o mernu m m whnụ a anya, me nye be murnu lele nnwọ ká aka. ⁹ M bụ m nye zikakworu matị n'esilawuru ele izi, m kwésile m be sukwu m nye izi, kwnornu nụ m mekparụ m ọgbako Chiokike ẹhni. ¹⁰ Kọvu hite n'oru Chiokike, m bụ m nhne me bụ. Oru o nyernu m bụo n'etekne. Kọvu m dọligburu m ẹhni m n'ernu kakwo kpakara ele izi, ọ bụ n'ezi nụ ọ bụo me nọornu, kọvu oru Chiokike nọornu ernalu nụ rime m. ¹¹ Kam kpararụ, ọ bụ me, mọbu be, a znirni izi ọma, kam bụ nhne anụ kweru.

*Olizọ n'ẹnwu ele
nwụrnu ẹnwu*

¹² O bụru nụ izi ọma aị bụ nụ Karaịsi hiri n'ẹnwu lizọ, ndaa kpa agwna anụ naakaa nụ ele nwụrnu ọnwu zá neelizọ n'ẹnwu? ¹³ O bụru nụ ele nwụrnu ọnwu zá neelizọ n'ẹnwu, o neegesi nụ Karaịsi híge n'ẹnwu lizọ. ¹⁴ O bụru nụ Karaịsi híge n'ẹnwu lizọ, izi ọma a znirni anụ bụ nhne etekne, ọkwnata ovu anụ bụ masị nhne etekne. ¹⁵ Tụkwasi n'olu a, a bụ ele akebne aghalaghala megidne Chiokike, a naagba akebne megidne Chiokike nụ o mernu Karaịsi hi n'ẹnwu lizọ, nye o méne o hi n'ẹnwu lizọ, ọ bụru nụ ele nwụrnu ọnwu jéelizọ n'ẹnwu. ¹⁶ Kwnornu nụ ọ bụru nụ ele nwụrnu ọnwu jéelizọ n'ẹnwu, Karaịsi híge n'ẹnwu lizọ. ¹⁷ O bụru nụ Karaịsi híge n'ẹnwu lizọ, ọkwnata ovu anụ bụ nhne etekne, anụ zị kọriri nụ mmehie anụ. ¹⁸ Kam neegesi nụ ele dnarnu n'anyarna ẹnwu bụ ele kweru nụ Karaịsi whuru etekne. ¹⁹ O bụru nụ okwokọlam nụ budnu ka a zị bụ hne a nwernu ọkwnata ovu nụ Karaịsi, a bụ ele be kwesiri ọ dọnu obirizi kakwọ kpakara ele wu n'ọwa.

²⁰ N'ezi ọka, Chiokike mernu Karaịsi hi n'ẹnwu lizọ, bụ mkpuru mbọm ke ele nwụrnu ọnwu. ²¹ Kpa ẹnwu hiri n'aka badnu va, kpa masị, olizọ n'ẹnwu hiri n'aka badnu va. ²² Kwnornu nụ kpakara badnu nwụrnu ẹnwu nụ rime Adam, kpa masị, Chiokike jeeme kpakara badnu ziri budnu nụ rime Karaịsi. ²³ Kọvu nye ọbula n'ige ke a, Karaịsi bụ mkpuru mbọm, omekwo, kpakara ele kweru nụ Karaịsi nga ọ jaava. ²⁴ Omekwo, okwukwo kpakara nhne jaava, nga Karaịsi lụgburu kpakara rikne, nụ ele nẹchi ẹchi, nụ kpakara iknernema,

o jeenyewhete Chiokike Nda ẹli-eze a. ²⁵ Kwnornu o jaachì tem ọ bítà kpakara ele irno nù mkpururu ọchi a. ²⁶ Nye irno ipne-aznù o joolulu bu ẹnwu. ²⁷ Kwnornu nù ọkwukwo nsọ kwuru, “Chiokike bítaru kpakara nhne nù mkpururu ọchi a.” A magwù nù Chiokike zá n'esilawùru kpakara nhne ka, nye bítaru kpakara nhne nù mkpururu Karaìsi. ²⁸ Nga kpakara nhne dazìri nù mkpururu Karaìsi, Karaìsi jaadazì nù mkpururu nye wam bítaru kpakara nhne nù mkpururu a, ma Chiokike buru nye nẹchi kpakara nhne.

²⁹ Ọ buru nù ele nwùrnu ọnwu zá neelizo n'ẹnwu, mbnarna kìnì bu nhne ele be nọowu mini kwnornu ele nwùrnu ọnwu jeenwe? Kìnì kpayarù be nọowu be mini kwnornu ele nwùrnu ọnwu? ³⁰ Ndaa nhne mernu a neeze budnu ige ọbula? ³¹ M zì m n'ọnu ẹnwu kpakara ọbochi. Rùmu nda m, m nookwu ka kwnornu nù m jì m anù naanya risi, anù zì nù rime Karaìsi Jizọsi Nyenwe aì. ³² Ọ buru lele badnù etekne me nù anọhia ọjo lùru ọgwnu nù Efesọsi, ndaa nhne me jeenwehìa? Ọ buru nù ele nwùrnu ọnwu zá neelizo n'ẹnwu,

“Ngwa ma a ri, nwọ tna,

kwnornu ekile a jọnwu.”

³³ Anù kwé be duwhu anù. “Ele enyi ọjo noolulu agwa ọma.” ³⁴ Anya dno anù nù risi, anù méé mmehie. Agwna anù máa Chiokike. M nookwu ka ma iwħnerne tù anù.

Anọ-ẹhni a jeenwe

³⁵ Kọvu agwna anù jaakaa, “Ndaa kpa ele nwùrnu ọnwu jeelizo? Ndaa anọ-ẹhni be jeenwe?”

³⁶ Jì nye iwħnirniwhno. Nga ì kpasìri mkpùru n'ẹli,

o jóofu okwolem ma ọ beru ọsno nwu. ³⁷ Nhne ị kpasiri n'eli bu mkpuru etekne, mkpuru ikpa, mọbu mkpuru berere, ọ búo isisi. ³⁸ Chiokike jeenye mkpuru wam ẹhni ke masiri a. O neenye mkpuru ọbula ẹhni ke a. ³⁹ Kpakara anọ-ẹhni búo otu, badnu nwernu anọ-ẹhni, anohia nwernu anọ-ẹhni ke berere, ọnunu nwernu anọ-ẹhni ke berere, aznu anọ-ẹhni berere. ⁴⁰ Anọ-ẹhni ke oligwe zi, anọ-ẹhni ke ọwa zi masi, ọma mma ke oligwe zi, ọma mma ke ọwa zi masi. ⁴¹ Mma ke ẹhnam zi ichne, ẹnwa nwernu ọma mma ke a, mma ke mbọ zi ichne, mma ke mbọ zi ọdo n'odo.

⁴² Kpam masi bu kpa olizo n'enuwuzi, anọ-ẹhni ke be kpasiri n'enuwuzi nwernu rikne ro oro, nga Chiokike gwelizoru a, o jóoro oro. ⁴³ Be kpasiri a n'iwahnerne, Chiokike gwelizo a n'igwugwu, be kpasiri a n'inwe ogwugwu, Chiokike gwelizo a n'iknema. ⁴⁴ Be kpasiri a anọ-ẹhni etekne, Chiokike gwelizo a n'anọ-ẹhni ke enine. Anọ-ẹhni ke etekne zi, anọ-ẹhni ke enine zi masi. ⁴⁵ Kwnornu be gbaruzi n'okwukwo nsọ, "Adam badnu mbom bu badnu ke zi budnu." Kọvu Adam ke ipne-aznu bu Enine ke neenye budnu. ⁴⁶ Anọ-ẹhni ke enine bége ọsno, kọvu anọ-ẹhni etekne, omekwo, ke enine sno a. ⁴⁷ Adam ke mbom bu rizza ke ọwa, Adam ke ẹbo hi n'oligwe va. ⁴⁸ Lele badnu be jiri rizza kpu, bu kpa ele ke rizza bu, ele ke oligwe nu lele nye wam hi n'oligwe va. ⁴⁹ Lele kpa a vuru oyiye ke badnu ke rizza, kpam masi bu kpa a joovuru ke oligwe lele badnu wam hi n'oligwe va.

⁵⁰ Rumu nda m, ka bu nhne me nookwu, kwnornu anọ-ẹhni nu ọvnarna jékehia eli-eze

Chiokike. Nhne jọonwu ọnwu jéekheja nhne jọonwu ọnwu. ⁵¹ Le, me kanu anu nhne miri emi, o buo kpakara ai jọonwu ẹnwu, kovu be jaagbanwo kpakara ai, ⁵² n'ige mati, n'otu nsnabi anya, nga okwodu ipne-aznu dnarnu. Kwnornu nu be jogbu okwodu, ele nwurnu ọnwu jeelizo roge oro, be jaagbanwo ai. ⁵³ Kwnornu nu anọ-ẹhni ke joro oro jooworu anọ-ẹhni ke joro oro, anọ-ẹhni ke jọonwu ẹnwu jooworu anọ-ẹhni ke jọonwu ẹnwu. ⁵⁴ Nga anọ-ẹhni ke joro oro wokparu anọ-ẹhni ke joro oro, anọ-ẹhni ke jọonwu ọnwu woru anọ-ẹhni ke jọonwu ọnwu, nhne be gbaru n'okwukwo nso jeemezu, "Be megburu ẹnwu."

⁵⁵ "Enwu, ndaa hne mmeri i zi?"

Enwu, ndaa hne nhne ogbugba i zi?"

⁵⁶ Nhne ogbugba ẹnwu bu mmehie, iknernema mmehie bu iwu. ⁵⁷ Kovu a notunu Chiokike mmamma nye neenye ai mmeri hite nu Nyenwe ai Jizosi Karaisi.

⁵⁸ Rumu nda m, ele me whurnu n'anya, anu gwuzosi rikne, anu kweko be whome anu, anu gweru kpakara mkpoma anu noru ẹnu Nyenwe ai ige obula, hne anu magwu nu ẹnu anu nu rime Nyenwe ai jowhu etekne.

16

*Otu iwai ke
rumu Chiokike*

¹ Gbasiri iwai be jootunu rumu Chiokike ke zi nu Judiya, anu mee kpa me kannu ogbako Chiokike ke zi nu Galasia. ² N'obochi mbom ke ikwezu, nye obula bita iwai ichne lele kpa o nwernu, o bitakwata a nkari ma anu zoma o tu iwai nga me

jaava. ³ Nga me varu m jaagba okwukwo izi nyee ele anu hohiaru, m zizne be gwezne nkesi anu nu Jeruselem. ⁴ O buru nu o buru oma, me nu be joosno zne.

Oriasno Polu

⁵ Nga me zne zuru Masidonia, m jaavakwnusi anu, kwnornu m jeezne Masidonia. ⁶ Me nu anu jaadazi ige mati mabu tem okirika whe, ma anu yinu m aka m zne hne obula me jeezne. ⁷ M piole m o whnu anu ige mati, kovu m piuru m me nu anu daziri gbu okwnu, o buru nu Chiokike kwe. ⁸ Kovu m jaadazi hna nu Efesosi du obochi Pentikosi. ⁹ Kwnornu nu be gbamannu m okne onuhna ernu izi oma hna, kovu agida ele neemegidne m zi masi.

¹⁰ O buru nu Timoti va, anu kweko ogwnu tu a kpa o zi n'esilawuru anu, kwnornu nu o noornu ernu Nyenwe ai lele me. ¹¹ O za nye ledna a anya, anu yinu a aka ma o lizo izne a n'udno, vakwnusi m. M neele anya ya nu rumu nda ai.

¹² Nhne gbasiri nwene ai rukna Apolosi, m riasnornu m a agida ige ma ya nu rumu nda ai va lekasi anu, kovu o jiknene o va kitna. O jaava nga o nwehiaru oghere.

¹³ Anu sama anya anu, anu gwuzosi rikne n'okwnata ovu, ovu si anu rikne, anu gho ele dikne. ¹⁴ Anu gweru owhnun'anya rnu kpakara ernu anu.

¹⁵ Anu magwu nu ele oro Stefanasi bu ele mbom ghoru ele Karaisi nu Akaya. Be ji kpakara nhne be nwernu noornu ele Chiokike ernu. M naariasno anu, ¹⁶ anu bita ehni anu nu mkpururu ele nu kpa nu nye obula ke ji mkpoma be snornu be noornu ernu. ¹⁷ Ovu soru m n'onu nga Stefanasi nu

Fọtunatosi nù Akaiḱosi varù, be mesirni owu anù ke kọru m. ¹⁸ Be vulizọru ovu m nù ovu anù masi. Ele nù kpa kwesiri be hnata be ama.

¹⁹ Ọgbako Chiokike ke zì nù Esia neebekwu anù. Akwila nù Prisila nù ọgbako Chiokike zì n'oro be ji rẹwhna Nyenwe aì neebekwu anù k'agida.

²⁰ Kpakara rumu nda ele zì hna neebekwu anù. Anù bekwurita ibne anù lele rumu nda.

²¹ Mawa, Pọlu, ji aka m naagba obekwu ikwu ka.

²² Be vù nye ọbula ke whnúge Nyenwe aì n'anya ọnu. Nyenwe aì, vaa.

²³ Oru ke Nyenwe aì Jizọsi dazinu anù.

²⁴ Ọwhnun'anya m nù rime Karaḱsi Jizọsi dazinu kpakara anù.

Tesitamenti Ikne n'O_{nu} Ikwere **New Testament in Ikwere**

copyright © 2010 Wycliffe

Language: Ikwere

Translation by: Wycliffe

Ikwere – (ikw) Nigeria

The Iwerre language of Nigeria can also be spelled Ikwere and Ikwerri. This language is spoken primarily by the Ikwerre people who live in the Rivers State of Nigeria and is one of the many ethnic groups in the Niger Delta. There were more than 23,000 speakers of this language in 1973. There is also a considerable local interest in literacy and grammar.

Copyright Information

© 2010, The Nigeria Bible Translation Trust. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789789076369

New

The New Testament

in Ikwere

© 2010, The Nigeria Bible Translation Trust.
All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-09

PDF generated using Haiola and XeLaTeX on 11 Nov 2022 from source files dated 29 Jan 2022

c17ee3a1-1c7a-5c05-8e0f-5043e8228d89